

## SWARTLAND MUNISIPALITEIT

Kennis geskied hiermee ingevolge die bepalings van artikel 13 van die Munisipale Stelselwet, 2000 (Wet 32 van 2000) dat die Munisipale Raad van die Munisipaliteit Swartland, die verordening soos uiteengesit in die skedule hiertoe, gemaak het en neem dit 'n aanvang op 1 Februarie 2011.

### SKEDULE

#### VERTOON VAN PLAKKATE EN BANIERE

##### AANHEF

Die doel van hierdie Verordening is om die vertoon van plakkate binne die munisipale gebied van Swartland Munisipaliteit te reguleer op 'n wyse wat omgewings sensitief is. Hierdie Verordening poog om 'n ewewig tussen reklamegeleenthede aan die een kant, en die bewaring van visuele, toeriste-, omgewings- en erfeniskenmerke aan die ander kant te vind.

Hierbenewens moet plakkate en baniere nie verkeersveiligheid in gevaar stel en ook nie die karakter van 'n omgewing nadelig beïnvloed nie.

### 1. WOORDOMSKRYWINGS

In hierdie Verordening, tensy uit die samehang anders blyk, beteken

“**banier**” enige materiaal waarop 'n advertensie op so 'n wyse vertoon word dat dit in windstil toestande ten volle leesbaar is, aan een of meer toue, pale of vlagpale vasgeheg is wat vertikaal, horisontaal of met 'n hoek uitsteek, of aan geboue of spesiale strukture vasgeheg is, maar sluit nie baniere in wat as deel van 'n optog gedra word nie. 'n Vlag wat nie op 'n goedgekeurde vlagpaal vertoon word nie, word vir die doeleindes van hierdie Verordening as 'n banier beskou;

“**Munisipaliteit**” die Swartland Munisipaliteit, insluitend enige uitvoerende raadslid, of komitee wat deur die Munisipaliteit daargestel is, of enige werknemer daarvan wat in verband met hierdie Verordening optree uit hoofde van 'n bevoegdheid wat by die Munisipaliteit berus en deur die Munisipaliteit aan sodanige werknemer gedelegeer is;

“**nasionale pad**” 'n nasionale pad soos omskryf in die Nasionale Padverkeerswet No 93 van 1996;

“**nuwe advertensie**” enige advertensie wat vir die eerste keer na die afkondiging van hierdie Verordening vertoon word;

“**openbare plek**” 'n openbare pad soos omskryf in die nasionale padverkeerswet nr. 93 van 1996;

“**padreserwe**” die gebied binne die statutêre breedte van 'n pad, en sluit in ryvlakke, skouers en sypaadjies en die lugruim bokant sulke ryvlakke, skouers en sypaadjies en alle ander gebiede binne die padreserwegrens;

“**plakkaat**” tydelike advertensies wat aan die munisipale elektriese lammale vasgeheg kan word en/of op vaste aangewese strukture binne padreserwes geplak kan word om gebeure, veldtogte asook verkiesings of referendums te adverteer;

“**staatsinstelling**”:

(1) enige staatsdepartement of administrasie in die nasionale, provinsiale of plaaslike regeringsfeer;

(2) enige ander funksionaris of instelling:

(i) wat ingevolge die Grondwet of 'n provinsiale grondwet 'n bevoegdheid uitoefen of 'n funksie verrig; of

(ii) ingevolge enige ander wetgewing 'n openbare bevoegdheid uitoefen of 'n openbare funksie verrig;

“**verkeersein**” 'n padverkeersein soos bepaal in die Nasionale Padverkeerswet No 93 van 1996;

“**verkeerstek**” 'n padverkeerstek soos bepaal in die Nasionale Padverkeerswet No 93 van 1996;

“**vredesbeampte**” 'n verkeersbeampte en ook 'n verkeersopsigter wat kragtens artikel 3A van die Nasionale Padverkeerswet No 93 van 1996 aangestel is, en sluit in enige landdros, justisie, polisiebeampte, korrektiewe beampte soos omskryf in die Wet op Korrektiewe Dienste No 8 van 1959, en, met betrekking tot enige gebied, misdryf, kategorie misdrywe of bevoegdheid bedoel in 'n kennisgewing wat kragtens artikel 334(1) van die Strafproseswet No 51 van 1977 uitgereik is, enigiemand wat kragtens daardie artikel 'n vredesbeampte is;

“**wimpel**” tydelike advertensies wat aan die munisipale elektriese lammale vasgeheg kan word en/of op vaste aangewese strukture binne padreserwes geplak kan word om gebeure, veldtogte asook verkiesings of referendums te adverteer.

## 2. INDIENING VAN AANSOEKE

- 2.1 Niemand mag sonder die Munisipaliteit se goedkeuring ingevolge hierdie Verordening 'n plakkaat of banier vertoon of 'n advertensie vir reklame oprig nie.
- 2.2 Elkeen wat van voorneme is om 'n plakkaat of banier te vertoon, moet 'n skriftelike aansoek by die Munisipaliteit indien en die volgende inligting moet dit vergesel:
  - (1) 'n kopie van die plakkaat wat vertoon gaan word;
  - (2) besonderhede van die spesifieke veldtog wat die plakkaat sal adverteer; en
  - (3) besonderhede van die tydraamwerk, met ander woorde vertoondatum.
- 2.3 Elke aansoek moet vergesel wees van die voorgeskrewe deposito soos van tyd tot tyd deur die Munisipaliteit bepaal. Geen plakkate mag vertoon word voordat hierdie deposito ten volle betaal is nie.

## 3. VERSKILLENDE Tipes AANSOEKE

Slegs plakkate, baniere en kennisgewings in die volgende kategorieë mag vertoon word en sal deur die Munisipaliteit oorweeg word:

- (1) Plakkate met die hoofdoel om 'n godsdienstige, sport-, opvoedkundige, kulturele, toerisme-, liefdadigheids-, of soortgelyke gebeurtenis van 'n niekommersiële aard te adverteer, met dien verstande dat so 'n gebeurtenis binne die grense van die munisipale gebied gaan plaasvind;
- (2) Koeranthoofopskrifplakkate van die dag van 'n dagblad, weeklikse of naweekkoerant;
- (3) Plakkate vir parlementêre, provinsiale of munisipale verkiesings (met inbegrip van tussenverkiesings) en referendums, asook veldtogte deur staats- en parastatale instellings om demokrasie, goeie bestuur of soortgelyke beginsels, of enige nasionale, provinsiale of munisipale Imbizo, of soortgelyke gebeurtenis te bevorder;
- (4) Plakkate vir openbare bewusmakingsveldtogte en kennisgewings van 'n openbare vergadering.

## 4. KOSTE

Die Munisipaliteit bepaal van tyd tot tyd die koste van die verwydering van plakkate deur die Munisipaliteit, welke koste van die aansoeker se deposito verhaal sal word indien die aansoeker nie 'n plakkaat of al die plakkate verwyder op die datum waarop dit kragtens die goedkeuring soos deur die Munisipaliteit verleen verwyder word nie. Die Munisipaliteit sal die volle of die res van die deposito, nadat hierdie koste afgetrek is, eers terugbetaal wanneer alle plakkate verwyder is.

## 5. ALGEMENE FAKTORE VIR OORWEGING VAN GOEDKEURING

In die oorweging van 'n aansoek vir die aanbring van 'n plakkaat ingevolge hierdie Verordening, of 'n wysiging of voorwaarde wat by 'n goedkeuring voorgeskryf is of voorgeskryf gaan word, neem die Munisipaliteit die volgende faktore in ag:

- (1) Geen plakkaat of banier mag enige materiaal of grafika vertoon wat, hetsy in vorm, inhoud of albei, na redelike verwagting, vir die publiek of 'n identifiseerbare klas-mense aanstootlik sal wees nie.
- (2) Geen plakkaat of banier mag vertoon word of sal toegelaat word om vertoon te word indien dit, hetsy kunsmatig of natuurlik, nadelig sal wees of andersins 'n nadelige invloed op die omgewing sal hê nie.
- (3) Indien 'n advertensie na die mening van die Munisipaliteit op enige wyse 'n gevaar daarstel of obseen is, kan die Munisipaliteit self, sonder om 'n kennisgewing te bestel, sodanige advertensie verwyder.

## 6. STANDAARDSTRUKTUURVEREISTES

So en behalwe die vereistes in Bylae 1 en 2 by hierdie Verordening, is die volgende voorwaardes van toepassing:

- (1) Die persoon wat 'n plakkaat of banier aanbring, is vir die onderhoud daarvan aanspreeklik.
- (2) Elke plakkaat of banier en sy steunstruktuur moet in 'n goeie toestand gehou word.
- (3) Waar 'n plakkaat of banier skeur of beskadig raak of andersins verval raak, moet die eienaar van so 'n plakkaat of banier of die persoon wat dit vertoon dit verwyder binne drie (3) werksdae na ontvangs van 'n kennisgewing om dit te doen.
- (4) Plakkate of baniere moet aangebring word op 'n hoogte wat vandalisme ontmoedig.

## 7. VERKEERSVEILIGHEIDSVEREISTES

- 7.1 Plakkate mag nie aangebring word op plekke waar hulle 'n onaanvaarbare afleiding vir bestuurders is, of waar bestuurders draai, deur kurwes of verkeersamevloeiings, uiteenlopings of dwalings gaan nie.
- 7.2 Plakkate mag nie aangebring word waar hulle tot 'n onveilige verkeersstoestand kan bydra of binne 50 meter van op- of afritte van openbare paaie en verkeersrigtingtekens en buiteligreklameborde oor paaie (oorhoofse portale) nie.
- 7.3 Plakkate mag nie aangebring word in 'n gebied waar die verkeersvolume, die gemiddelde volgafstand of ongeluksgeschiedenis 'n hoër as die gemiddelde bewustheidsgraad van bestuurders vereis nie.
- 7.4 Plakkate mag nie aan 'n padverkeersteken of verkeersein waarvoor daar spesifiek in die Suid-Afrikaanse Padverkeerstekenhandleiding en/of die Suid-Afrikaanse Ontwikkelingsgemeenskap se Padverkeerstekenhandleiding voorsiening gemaak word, aangebring word of dit belemmer nie.
- 7.5 Plakkate mag nie binne die padreserwe van 'n openbare pad aangebring word nie tensy hierdie Verordening spesifiek daarvoor voorsiening maak.
- 7.6 Indien verkeersveiligheidsvereistes nie nagekom word nie, of indien die vertoon van plakkate of baniere op enige wyse as nadelig vir verkeersveiligheid beskou word, mag die Munisipaliteit se vredesbeamptes sulke plakkate of baniere onmiddellik verwyder sonder om die aansoeker se toestemming daartoe te verkry.

## 8. REGSVEREISTES

Alle plakate wat aangebring en/of binne die regsgebied van die Munisipaliteit vertoon gaan word, moet, benewens voldoening aan hierdie Verordening, aan alle ander toepaslike wetgewing, insluitend enige toepaslike Soneringskemaregulasies, voldoen.

## 9. GOEDKEURING

Die Munisipaliteit kan te eniger tyd die goedkeuring terugtrek wat ingevolge hierdie Verordening of sy voorloper verleen is, of enige voorwaarde wysig of 'n verdere voorwaarde ten opsigte van sodanige goedkeuring oplê, indien 'n plakkaat vervalte is, nie meer aan enige bepaling van hierdie Verordening voldoen nie, of wat die grafiese inhoud daarvan betref aansienlik van die oorspronklike goedgekeurde aansoek afwyk.

## 10. APPÈL

10.1 Enigiemand wie se regte geraak word deur 'n besluit wat die Munisipaliteit in verband met hierdie Verordening neem, kan teen daardie besluit appelleer deur binne 21 dae van die datum van die kennisgewing van die besluit skriftelike kennis van die appèl en redes aan die Munisipale Bestuurder te gee.

10.2 Die Munisipale Bestuurder moet die appèl onmiddellik aan die paslike appèlowerheid voorlê.

10.3 Die appèlowerheid moet die appèl oorweeg, en die besluit bevestig, verander of terugtrek, maar geen sodanige verandering of terugtrekking van 'n besluit mag enige regte verminder wat as gevolg van die besluit ontstaan het nie.

10.4 Wanneer daar geappelleer word teen 'n besluit geneem deur:

- (1) 'n personeelid buiten die Munisipale Bestuurder, is die Munisipale Bestuurder die appèlowerheid;
- (2) die Munisipale Bestuurder, is die Uitvoerende Komitee of die Burgemeester die appèlowerheid; of
- (3) 'n Politieke Struktuur of Politieke Ampsbekleër, of 'n Raadslid, is 'n Komitee van Raadslede wat nie by die besluit betrokke was nie en deur die Munisipale Raad vir hierdie doel aangestel is, die appèlowerheid.

10.5 'n Appèlowerheid moet binne ses weke na ontvangs van die appèl met die appèl begin en die appèl binne 'n redelike tydperk beslis.

## 11. SKADE AAN MUNISIPALE EIENDOM

11.1 Niemand mag met die aanbring of verwydering van 'n plakkaat of banier skade aan enige boom, elektriese paal of diens of ander munisipale installasie of eiendom en straattoerusting veroorsaak nie.

11.2 Enigiemand wat munisipale eiendom beskadig, is vir die herstelkoste aanspreeklik.

## 12. MISDRYWE

12.1 Enigiemand wat:

- (1) 'n bepaling van hierdie Verordening oortree of versuim om daaraan te voldoen;
- (2) 'n vereiste oortree wat in 'n kennisgewing uiteengesit is wat aan hom of haar ingevolge hierdie Verordening beteken is, of versuim om daaraan te voldoen;
- (3) 'n voorwaarde oortree wat ingevolge hierdie Verordening opgelê is, of versuim om daaraan te voldoen;
- (4) wetens 'n vals verklaring ten opsigte van enige aansoek ingevolge hierdie Verordening aflê,

is skuldig aan 'n misdryf en by skuldigbevinding aanspreeklik vir 'n boete of gevangenisstraf soos hieronder uiteengesit; en

in die geval van 'n voortdurende misdryf, aan 'n boete soos hieronder uiteengesit, vir elke dag tydens die duur van so 'n misdryf nadat 'n skriftelike kennisgewing deur die Munisipaliteit uitgereik is wat staking van so 'n misdryf vereis; en

vir 'n tweede of daaropvolgende misdryf, by skuldigbevinding aanspreeklik vir 'n boete of gevangenisstraf soos hieronder uiteengesit.

12.2 Die boetes en strawwe wat ingevolge hierdie Verordening op misdrywe van toepassing is, is soos volg:

- (1) by 'n eerste skuldigbevinding, is die skuldige party aanspreeklik vir 'n boete van hoogstens R500,00, soos van tyd tot tyd aangepas ingevolge die Wet op die Aanpassing van Boetes No 101 van 1991, of by versuim om te betaal, vir gevangenisstraf vir 'n tydperk van hoogstens twee maande;
- (2) in die geval van 'n voortdurende misdryf, is die skuldige party aanspreeklik vir 'n verdere boete van hoogstens R300,00, soos van tyd tot tyd aangepas ingevolge die Wet op die Aanpassings van Boetes No 101 van 1991, vir elke dag gedurende die voortdurende van so 'n misdryf;
- (3) by 'n tweede of daaropvolgende skuldigbevinding, is die skuldige party aanspreeklik vir 'n boete van hoogstens R1 000,00, soos van tyd tot tyd aangepas ingevolge die Wet op die Aanpassings van Boetes No 101 van 1991, of by versuim om te betaal, vir gevangenisstraf vir 'n tydperk van hoogstens ses maande.

12.3 Onwettige plakate wat deur die Munisipaliteit verwyder word, kan binne een maand teruggeëis word by volle betaling aan die Munisipaliteit van enige koste wat met die verwydering van die genoemde advertensie aangegaan is, asook die storingskoste wat vir die stoor so 'n plakkaat opgeloop het. Onwettige plakate wat deur die Munisipaliteit verwyder word en nie binne een maand na verwydering teruggeëis word nie, sal deur die Munisipaliteit van die hand gesit word om die verwyderings- en/of storingskoste te dek.

## 13. VERMOEDENS

Enigiemand wat ingevolge hierdie Verordening van 'n misdryf beskuldig word en:

- (1) die eenaar is van grond of 'n gebou waarop 'n plakkaat vertoon is of vertoon word, word geag wetens so 'n plakkaat te vertoon, of te laat vertoon totdat die teendeel bewys word;
- (2) alleen of saam met 'n ander persoon verantwoordelik is vir die organisering van enige vergadering, funksie of gebeurtenis waarmee 'n plakkaat verband hou, of in beheer daarvan is, word geag wetens elke plakkaat wat in verband met sodanige vergadering, funksie of gebeurtenis vertoon word, te vertoon of toe te laat dat dit so vertoon word, totdat die teendeel bewys word;

- (3) die persoon wie se naam op 'n plakkaat verskyn of wie se produk of dienste op so 'n plakkaat geadverteer word, word totdat die teendeel bewys word, geag sodanige advertensie te vertoon, of toe te laat dat dit vertoon word tensy die teendeel bewys word.

#### 14. TOEPASSING EN VERWYDERING VAN PLAKKATE EN BANIERE

- 14.1 Indien 'n plakkaat wat vertoon word strydig is met hierdie Verordening, kan die Munisipaliteit 'n kennisgewing beteken aan die persoon wie se produk of dienste geadverteer word, en 'n beroep op so 'n persoon doen om die plakkaat binne 'n gespesifiseerde tydramwerk te verwyder of sodanige verandering daaraan aan te bring, of sodanige werk te doen wat in so 'n versoek of kennisgewing gespesifiseer word.
- 14.2 Indien die Munisipaliteit se eise soos in die kennisgewing uiteengesit, nie uitgevoer word binne die tydperk wat daarin gespesifiseerde word nie, kan die Munisipaliteit na verkryging van 'n Hofbevel die plakkaat verwyder, met dien verstande dat so 'n hofbevel nie nodig sal wees indien die betrokke plakkaat voor die verwydering daarvan op munisipale eiendom vertoon word nie.
- 14.3 Indien die Munisipaliteit 'n plakkaat verwyder, hoef die Munisipaliteit nie enigiemand vir enige verlies of skade wat deur sodanige verwydering veroorsaak word, te vergoed nie.
- 14.4 Enige koste wat die Munisipaliteit met die verwydering van advertensies aangaan, kan, behoudens paragraaf 4 van hierdie Verordening, verhaal word van die persoon aan wie die kennisgewing beteken is.

#### 15. BETEKENING VAN KENNISGEWINGS

Waar 'n kennisgewing of ander dokument ingevolge hierdie Verordening aan enigiemand beteken moet word, word dit geag behoorlik beteken te wees indien dit persoonlik beteken is aan hom of haar of 'n lid van sy of haar huishouding, klaarblyklik bo die ouderdom van 16 jaar, by sy of haar verblyfplek, of aan enigiemand wat by hom of haar by sy of haar besigheidsplek in diens is, of indien dit per geregistreerde pos geos is aan so 'n persoon se woon- of besigheidsadres soos dit in die rekords van die Munisipaliteit verskyn, of indien so 'n persoon 'n maatskappy, beslote korporasie of 'n trust is, dit aan enigiemand beteken is wat klaarblyklik by daardie maatskappy, beslote korporasie of trust in diens is, by die geregistreerde kantoor daarvan, of per geregistreerde pos aan sodanige kantoor gestuur is.

#### 16. JURISDIKSIE VAN DIE LANDDROSHOF

Ondanks andersluidende bepalings wat in enige wet met betrekking tot landdroshowe vervat is, het 'n Landdros jurisdiksie om op aansoek deur enige plaaslike owerheid, 'n bevel vir die toepassing van die bepalings van hierdie Verordening te maak, of van enige goedkeuring, weiering of voorwaarde wat ingevolge daarvan van toepassing is.

#### BYLAAG 1

##### ADVERTEER VAN BANIERE

Bykomend tot die voorwaardes wat in hierdie Verordening vervat is, is die volgende met betrekking tot die aanbring van baniere van toepassing:

1. Goedkeuring vir derdepartyreklame op baniere word slegs verleen vir 'n funksie of gebeurtenis vir godsdienstige, opvoedkundige, maatskaplike welsyns-, dierewelsyns-, sport-, burgerlike, toerisme- of kulturele doeleindes, of vir 'n funksie of gebeurtenis wat met 'n munisipale, provinsiale of parlementêre verkiesing of referendum verband hou. Die vertoon van sulke baniere moet voldoen aan die Munisipaliteit se standaardvoorwaardes rakende die vertoon van baniere soos hieronder uiteengesit.
2. Die vertoon van baniere is verbode op enige brug of oor enige openbare pad, en langs enige pad wat die Munisipaliteit van tyd tot tyd aanwys, tensy die Munisipaliteit spesifieke toestemming daartoe verleen het.
3. Baniere mag nie aangebring word op 'n wyse wat 'n gevaar vir verbygaande voetgangers of voertuigverkeer inhou nie.
4. Geen banier mag groter as 3m<sup>2</sup> wees nie, buiten met die vooraf verkreeë skriftelike goedkeuring van die Munisipaliteit.
5. Geen banier mag binne 30m van 'n padverkeersteken of verkeersein vertoon word nie.
6. Baniere mag nie aan verkeerseinpale of ander pale wat padverkeerstekens dra, ander natuurlike verskynsels, straattoerusting of ander munisipale eiendom vasgeheg word nie.
7. Baniere mag nie op so 'n wyse vasgeheg word dat hulle ander ondernemings/organisasies onregverdig benadeel of goedgekeurde bestaande advertensies belemmer nie.
8. Slegs een eerstepartyreklamebanier per perseel word toegelaat tensy die Munisipaliteit se skriftelike toestemming vir meer as een banier verkry word, en die aansoeker moet skriftelik die tydramwerk indien wat vir die aanbring van sodanige banier vereis word, welke tydramwerk hoogstens 10 dae mag wees tensy die Munisipaliteit in sy goedkeuring bepaal het dat 'n langer tydperk toegestaan is.

#### BYLAAG 2

##### PLAKKATE

Bykomend tot die voorwaardes wat in hierdie Verordening vervat is, is die volgende met betrekking tot die vertoon van plakkate van toepassing:

1. Nie meer as 'n gemiddeld van 50 plakkate per funksie of gebeurtenis (behalwe verkiesingsplakkate) mag in 'n aangewese gebied vertoon word nie.
3. Die plakkate mag nie groter as 0.9 x 0.6m wees nie.
3. Plakkate moet vasgeheg word aan munisipale elektrisiteitsligpale, waar beskikbaar, en slegs aangeplakte plakkate mag aangebring word aan aangewese strukture wat deur die Munisipaliteit goedgekeur is vir die uitdruklike doel om plakkate aan te plak. Plakkate mag nie op verkeerseinpale, of ander pale wat verkeerstekens dra, pale wat vir enige ander doel opgerig is, of enige ander straattoerusting, mure, heinings, bome, rotse of ander natuurlike verskynsels aangebring word nie.
4. Plakkate mag nie op munisipale elektriese ligpale, elektriese kaste, elektriese substasies en mure geplak word nie, maar moet op bord gemonteer en met sterk tou of plastiese bindstukke stewig vasgemaak word tensy 'n permanente raam vir hierdie doel goedgekeur is. Geen vasmaakmateriaal met 'n metaalinhoud word toegelaat nie.
5. Plakkate op torings, telekommunikasie maste of hoë maste word nie toegelaat nie.
6. Slegs een plakkaat per funksie of gebeurtenis mag op 'n paal vertoon word.

- (i) Geen plakkaat mag binne 30m van 'n padverkeersteken of verkeersein vertoon word nie.
  - (ii) Plakkate mag nie meer as 14 dae voor die datum van die funksie vertoon word nie. Plakkate moet binne drie dae na die gebeurtenis verwyder word ten einde vir 'n terugbetaling van die deposito te kwalifiseer.
7. Die Munisipaliteit kan gebiede aanwys waar plakkate nie vertoon mag word nie.
  8. Die Munisipaliteit of sy agent sal 'n plakkaat verwyder wat strydig met bogenoemde voorwaardes is.
  9. 'n Plakkaat wat nie verwyder is teen die datum waarna hierbo verwys word nie, sal deur die Munisipaliteit verwyder word.
  10. Die vertoon van ongemagtigde plakkate is onwettig en sulke plakkate sal ook deur die Munisipaliteit of sy agent verwyder word.
  11. Die aansoeker moet alle plakkate verwyder binne drie werksdae na die datum van die gebeurtenis, of die datum soos bepaal in die goedkeuring wat verleen is, welke ook al eerste is.
  12. Die vertoon van plakkate vir suiwer kommersiële reklame of deur kommersiële liggame vir wins, word nie toegelaat nie.

26 November 2010

22686